

Appel Pro Quotidiana – grazia fitg!

Dapi la fin da fanadur 2017 han passa 1700 personas sustegnì l'appel „proquotidiana“ cun inditgar en l'internet lur num e lur domicil. Entaifer in mais, e lura anc durant il temp da vacanzas, tantas signatarias e tants signataris - quai è ina ferma manifestaziun da solidaritad e simpatia per la suletta gasetta rumantscha dal di che resguarda en sia part redacziunala Rumantschas e Rumantschs da l'entira Rumantschia e sur ses cunfins ora.

La gruppa dals iniziants da l'appel vesa sia lavur principala sco fatga ed exprima in grond GRAZIA FITG a tut las personas ch'han dà lur num per quest appel e ch'han intimà era auters da far quai. Questa acziun n'è segiramain betg stada senza effect sin ils responsabels. E forsa che ina ni l'otra persuna che n'aveva enfin ussa betg anc La Quotidiana è vegnida conscienta da l'impurtanza dad ina gasetta per l'entira Rumantschia e daventa ussa schizunt abunenta. La pagina d'internet www.proquotidiana.ch resta activa vinavant per tut las personas che vulan anc signar l'appel.

La Quotidiana, edida da la Somedia a Cuir, era en privel da svanir cumpletta main sin la fin dal 2017. Ussa han la Lia Rumantscha, il Chantun Grischun e la Confederaziun ensemen cun la Somedia chattà ina soluziun transitorica enfin la fin dal 2018, quai ch'è zunt impurtant. Ma la lavur per propi cumenza pir. Ils iniziants speran, sin fundament da l'appel cun las numerusas suttascripziuns, che las personas ed organisaziuns responsablas cuntinueschian cun schlantsch lur lavur e mantegnian in spiert avert cura ch'i va per chattar ina nova via a lunga vista per ina gasetta quotidiana rumantscha. In pass enavos tar il regionalissem periclitass la convivenza ed engrevgiass la comunicaziun ed il svilup dad ina ferma Rumantschia. Sch'ina pitschna minoritad linguistica vul viver vinavant e vegnir respectada, resguardada e sustegnida cunzunt era d'ordaifer lura n'astga betg mintga pitschna vallada guardar mo per sasezza.

Ils iniziants da l'appel proquotidiana:

Hans Caprez, Castrisch; **Bernard Cathomas**, Cuir; **Giusep Nay**, Valbella; **Maria Cadruvi**, Ruschein; **Gion-Andri Cantieni**, Turitg